



## Directivas per la furmaziun supplementara da persunas d'instrucziun dal Grischun

relaschadas dal departament d'educaziun, cultura e protecziun da l'ambient ils 12 da december 2008 (disposiziun dal departament nr. 592)

### 1. Obligaziun da frequentar curs

Tut las persunas d'instrucziun da la scola populara grischuna e tut las persunas d'instrucziun da la scolina cun in pensum da 50 % e dapli èn obligadas d'impunder almain 12 mezs dis per la furmaziun supplementara, e quai entaifer trais onns da scola.

La mesadad dals curs obligatorics resp. da la furmaziun supplementara entaifer la scola po avair lieu durant il temp d'instrucziun. Ils curs da furmaziun supplementara individuals ston avair lieu cumplettaimain ordaifer il temp d'instrucziun.

Persunas d'instrucziun che frequentan ina scolaziun pedagogica supplementara complementara a la professiun en il decurs da lur activitad professiunala pon – sin dumonda – vegnir liberadas tras l'uffizi per la scola populara ed il sport da l'obligaziun da frequentar curs en il senn da las directivas, e quai durant ils onns ch'ellas frequentan lur scolaziun.

### 2. Purschida da curs reconuschida

#### 1.1 *Curs obligatorics:*

Curs ch'il departament d'educaziun, cultura e protecziun da l'ambient ha declerà sco obligatorics

#### 1.2 *Furmaziun supplementara entaifer la scola (FSS):*

Curs da furmaziun supplementara ch'èn reconuschids da l'uffizi per la scola populara ed il sport e ch'èn destinads per in entir team d'ina chasa scola u per in entir team da scola

#### 1.3 *Perfecziunament intensiv:*

Congedis che vegnan permiss da l'uffizi per la scola populara ed il sport tenor las "disposiziuns executivas per conceder e subvenziunar congedis da perfecziunament dals magisters da las scolas popularas"

#### 1.4 *Curs facultativs:*

- da la scola auta da pedagogia dal Grischun
- d'autras scolas autas da pedagogia
- da l'uniun "scola e furmaziun supplementara svizra" (swch.ch)
- da l'associaziun svizra per il sport en scola (ASSS)

1.5 *Actividad sco manadra resp. sco manader da curs en il rom da la furmaziun supplementara da persunas d'instrucziun*

1.6 *Ulteriurs curs che vegnan permess da las autoritads localas da scola resp. da scolina*

### **3. Participaziun als custs tras il chantun**

En cas da *curs obligatorics* surpiglia il chantun ils custs che resultan per la scolaziun dal cader, per las manadras e per ils manaders dals curs, per las localitads, per il material e per la documentaziun dals curs sco er per las spesas da pernottaziun da las participantas e dals participants tenor las tariffas da la legislaziun dal persunal.

En cas da *curs dad FSS* surpiglia il chantun tut ils custs per las manadras e per ils manaders dals curs (onorari, spesas da pernottaziun, d'alimentaziun e da viadi), premess ch'i vegnia cuntanschì il dumber minimal da 12 participantas e participants. Davart excepziuns areguard il dumber da participantas e da participants decida l'inspecturat districtual.

En cas da *curs da perfecziunament intensivs* surpiglia il chantun ils custs dals curs e paja las contribuziuns als custs da substituziun da persunas d'instrucziun da la scola populara e da la scolina en congedi.

### **4. Controlla da l'obligaziun da frequentar curs**

La controlla da l'obligaziun da frequentar curs è chausa da las autoritads da scola resp. da scolina.

### **5. Entrada en vigur**

Questas directivas entran en vigur il 1. da schaner 2009.